

欽  
定  
全  
唐  
文

欽定全唐文卷四百十一目錄

新文藝出版社藏書

常袞二

授裴遵慶吏部尚書制

授劉晏吏部尚書制

授崔渙工部尚書制

授崔倫尚書左丞制

授張重光尚書左丞制

授薛邕吏部侍郎制

授楊綰吏部侍郎制

授閻伯璵刑部侍郎等制

授王翊刑部侍郎制

授張謂禮部侍郎制

授蔣渙工部侍郎制

授韋元曾吏部郎中等制

授李規戶部郎中制

授裴倩度支郎中制

授邵說兵部郎中制

授李深兵部郎中制

授杜寂職方郎中制

授韋翹駕部郎中制

授鄭叔則吏部員外郎制

授崔夷甫金部員外郎等制

授褚長孺祠部員外郎等制

授陸海主客員外郎制

授房宗偃膳部員外郎制

授崔殷刑部員外郎制

授苗發都官員外郎制

授莫藏用比部員外郎制

授鄭渾水部員外郎制

授敬括御史大夫制

授張獻恭御史中丞制

授崔寬侍御史知雜事制

授李瑁侍御史知雜事制

授元巽侍御史制

授蔣將明侍御史制

授崔益侍御史制

授孫會侍御史制

授蓋文元殿中侍御史制

授王延休殿中侍御史制

授崔炎監察御史制

授源咸悌監察御史制

授梁裒監察御史制

授楊護監察御史制

欽定全唐文卷四百十一

常袞二

授裴遵慶吏部尚書制

門下尚書萬事之本選部五曹之右以掌邦典以掄官材  
漢魏以來多用宿儒高德蓋重其任也金紫光祿大夫守  
太子少傅集賢待制上柱國河東郡開國公裴遵慶周慎  
禮節敬讓素居博學而識前言懿文而敦大體迺者匡弼  
王室克和庶政訓導儲宮用宏三善日新之美歲晚彌彰  
自陶融於元和不嬰拂於俗務名臣令望清議攸歸處以

銓覈用澄流品抑華取實無俾滯才可吏部尚書散官勲  
封如故主者施行

授劉晏吏部尚書制

門下獻善宣美職在納言錄賢任能必歸家宰若萬事之  
本舉得其要一時之才選當其實則致理之體昭然可見  
矣簡求碩德俾之典綜金紫光祿大夫檢校戶部尚書兼  
御史大夫東都河南江淮山東等道轉運常平鑄錢鹽鐵  
等使上柱國彭城郡開國公劉晏時傑國楨高才博學超  
詣精理澹然素懷禮法之綱紀人倫之模表嘗處台弼以



宏訓範載其清靜濟我艱難自勞於外又竭心力苟利於國不憚其煩領錢穀轉輸之重資國家經費之本務其省約加以躬親小大之政必關於慮出入農里止舍鄉亭先訪便安以之均節事積而不亂理簡而易從故得井賦田租萬億及秭方舟而下以給中都水旱不歉人懷其惠可謂盡瘁事國勤勞王家也思有裒進屢申退讓然以官人之任朝選無踰藉其參領用鎮風俗所摠羣務一以咨之中外兼濟固有餘力可吏部尚書餘如故主者施行

授崔渙工部尚書制

勅程品之重有若百工號令之先尤難六職崔渙學義精  
洞文詞典麗道高王佐才茂國華實每副名言皆顧行頃  
調鼎餼庶政惟和及典銓衡羣才式序中外更茂縉紳所  
宗雅有大臣之節光其舊德之選冬卿命職汝往欽哉可  
工部尚書餘如故

授崔倫尚書左丞制

門下蘇武張騫使匈奴十餘歲不失節而歸漢武不過典  
屬國騫拜中大夫而已朕每以勞大賞薄而流嘆也頃以  
昆夷之俗繼好勤誠不忘綏懷喻我文告乃命太中大夫

前守太子右庶子兼御史中丞上護軍賜紫金魚袋崔倫  
宣明威惠撫柔四海言忠事直舉無二信臨大節而不奪  
匪謀身而苟免終能復命亦既序成使乎四方可謂專達  
況躬服謨訓暢於詞律在天寶中已踐郎位選部草議至  
今稱之顧其階歷當處要重之地加之盡瘁服勤所宜超  
進總典綱紀歸於臺轄以倫才理精密練達朝章俾參柄  
用佇明政本仍加榮級以勸勞臣可銀青光祿大夫行尚  
書左丞勲如故

授張重光尚書左丞制

門下國朝多以六卿之貳出領三輔入必稍遷或復舊職不然則以左右轄處之中外迭居從其班列銀青光祿大夫前華州刺史兼御史大夫充鎮國軍及潼關防禦等使上柱國清河縣開國侯張重光明道若昧大方無隅循禮以節事體信以達順罔有擇行在於厥躬其學既精其德亦厚可以質正大議和恒雅俗服在通列鬱其休聲周歷五曹之副建明萬事之本剖符關輔參化京師亦既政成且聞河潤紀綱臺務圖任舊人職無不綜佇有條理可行尚書左丞散官勳封如故主者施行

授薛邕吏部侍郎制

門下昔禹謂咎繇曰知人其難之魏武又云使吏部用心如毛玠風俗之易差不難矣今之銓綜但抑華崇本鎮以禮讓則庶官羣才不濫於進中散大夫守尚書禮部侍郎兼集賢殿學士判院事上柱國汾陽縣開國子賜紫金魚袋薛邕含和保真莫見其際雄詞祕學德行之餘信厚可親朝之英達往者潤色鴻業煥發絲言之美又與五經諸儒質正石渠之論擢以公望貳於秩宗豈惟人神之和兼舉孝秀之目鑒裁高朗加以直清進退可否歸於精實慎

乃服命五年如初擇吏辯言宜當慎選無易前政副子得人可守尚書吏部侍郎餘如故主者施行

授楊綰吏部侍郎制

門下興化在於官人掄材歸於吏部佐平邦典選重朝倫朝議大夫守尚書左丞集賢殿學士副知院事兼修國史楊綰澹雅貞亮宏其素範學究先儒之旨文高作者之興三揖而進能守謙光一命而僂不忘恭敬頃司論言彙掌史筆嘗亦秉直夙推無對領春卿佐轄之任有奏議紀綱之績令猷自治厚德彌彰參我密啟屬於清鑒當勵濯纓

之操不遺刈楚之才敬爾在公毋替厥服可尚書吏部侍郎餘如故

授閻伯璵刑部侍郎等制

門下古者參用名儒典領大郡或連書課績之最則次補公卿之缺今甄陶政化黜陟幽明若二千石理行第一中朝右職懸以相待俾長吏知勸至公大行銀青光祿大夫婺州刺史本州團練守捉使上柱國閻伯璵銀青光祿大夫衢州刺史本州團練守捉使樂陵縣開國男田季羔等早以文章侍從潤色綸言朝夕論思處正廷議名高德厚

推重周行歷踐藩郡一其政理本經術以制事參理法以訓人儉以約已而下不勞靜以存誠而吏不擾風淳俗泰表率方州懋能入遷美選無易慎平秋典給事黃門副子簡求以稱厥服伯璵可行尚書刑部侍郎散官勲如故季羔可行尚書給事中散官封如故主者施行

授王翊刑部侍郎制

門下書曰惟敬五刑以成三德秋官之任也貳卿良選其在茲乎充策回紇可汗使王翊力行近乎仁率性之謂道學以博物文能變風出入中外茂昭聲實靜而居易受不



辭難使乎四方不辱君命斯之謂矣今丕蔽未明簡孚未允命爾作小司寇敬平邦憲在寬可行刑部侍郎

授張謂禮部侍郎制

勅稱秩元祀春官職焉舉秀興廉國朝兼領非文儒碩茂鑒裁精實重於一時者不在此地中散大夫守太子左庶子上柱國河內縣開國子賜紫金魚袋張謂宏達有檢和平易容豈道廣而難周亦言滿而無擇博涉羣籍通其源流振起鴻藻正其聲律翰飛北閣煥發司言居部長人不忘惠訓輔相東禁孝友彰明貳宗伯之掌禮典諸侯之貢

金定全唐文 卷四十一  
士以爾公望副茲眷求可守尚書禮部侍郎散官勲封賜  
如故

授蔣渙工部侍郎制

門下夫任賢之急在適於事要當其才難豈限階序況中  
臺政本司舉舊章六卿貳職爲今盛選銀青光祿大夫守  
右散騎常侍上柱國汝南縣開國公蔣渙忠信孝友周而  
不器得元和之純能以禮節有至靜之妙豈因物遷溢聲  
華於文藻潤理體於經術中外之秩備更要重不失其正  
行之有恒自分貂蟬之列喻公卿之旨入告嘉猷直而不

許常執德於沖約亦忘情於進趨勤職已久所宜懋能百  
工唯時命汝典制可行尚書工部侍郎散官勲封如故主  
者施行

授韋元曾吏部郎中等制

勅朝議郎行尚書吏部員外郎賜緋魚袋韋元曾朝請大  
夫前行尚書司封員外郎兼侍御史護軍賜緋魚袋元挹  
等學業優深詞華通贍雅有縉紳之望列於郎署之間久  
在劇曹尤推精密自登膳部克舉彌綸選重一時職參六  
典宜膺並拜之寵式美齊名之論元曾可守尚書吏部郎

中散官賜如故元挹可行尚書吏部員外郎散官勲賜如故

授李規戶部郎中制

勅朝議郎前檢校尚書戶部郎中兼侍御史賜緋魚袋李規志學純備居有彝檢才理精達動無滯用嘗執邦憲兼毗使軒處煩行簡從容濟務參我地官之屬首於時俊之科亦既外除尤彰內行正名舊秩以寵迴翔可守尚書戶部郎中散官賜如故

授裴倩度支郎中制

勅朝議大夫前守饒州刺史嗣正平縣開國男賜紫金魚袋裴倩達識含精長材致遠秉彝尚晦金璞自明當劇居難干將獨割周厯臺閣綢繆藩鎮休聲異政亦克有終底慎材賦之殷校計軍國之用得專其任爰舉舊章佇爾發揮以之贍濟可尚書度支郎中散官封賜如故

授邵說兵部郎中制

勅宣德郎前守尚書司勳郎中賜緋魚袋邵說學致其道文達其變沈靜有用貞純秉彝藹然盛名光我華省長於奏議多所損益佐夏官之劇參戎事之殷膺此俊選佇揚

休問可守尚書兵部郎中散官如故

授李深兵部郎中制

勅朝議大夫前守衢州刺史賜紫金魚袋李深忠義之門  
懋昭前烈文儒之道宏著休問經通以濟於用廉介以約  
其心早擅吏能備更官序藩條之重理行尤彰亦旣休閑  
頗聞淹久宜膺郎署之選式允公才之拜可守尚書兵部  
郎中散官勲賜如故

授杜寂職方郎中制

勅朝議郎守尚書度支郎中賜緋魚袋杜寂端其一誠周

通於事久於膳部頗有敏才亦既詳達不忘恭慎掌我方志宜從序遷可守尚書職方郎中散官賜如故

授韋翹駕部郎中制

門下武部員外郎韋翹貞固幹事達理明權績惟著於在公才必聞於處劇遞遷郎署俾膺榮寵可爲駕部郎中

授鄭叔則吏部員外郎制

勅朝議郎檢校尚書吏部員外郎鄭叔則志經含章仗雅師儉固有擇行未嘗近名省理辨疑時稱簡達才盛居東之佐禮處司南之重高選髦士以分劇曹正其舊員允是

新命可尚書吏部員外郎散官如故

授崔夷甫金部員外郎等制

勅宣議郎守尚書駕部員外郎賜緋魚袋崔夷甫朝散大夫行尚書祠部員外郎上柱國韋敷等清心在公彊力從政縱橫之辨嘗亦專達綠飾以儒素推彊敏參訂奏議頗練朝章宜從滿歲之遷俾輔分曹之次夷甫可尚書金部員外郎散官賜如故敷可行尚書倉部員外郎散官勲如故

授褚長孺祠部員外郎等制



勅朝議郎行起居郎集賢殿直學士褚長孺等國之才人拔乎羣萃精力於學五經之大儒覃思於文三變而合雅繫年秉直及雷盡規侍從之勞著於厥服含香載筆允茲並命可依前件

授陸海主客員外郎制

勅朝議郎侍御史內供奉賜緋魚袋陸海儒流貫穿詞韻清麗貞以自檢峻而能通執法允歸於詳當開邪不畏於疆禦雖近遷柱史未終滿歲之勞而高選星郎實在一時之俊俾參奏議期有損益可行尚書主客員外郎散官賜

如故

授房宗偃膳部員外郎制

勅朝議侍郎御史內供奉充山南西道節度管內支度營田副使賜緋魚袋房宗偃孝謹之風克傳素業賢良之器早負清才頃主方書兼毗戎政澹雅高潔在公著美臺郎之盛妙選當人處以彌綸茲謂稱職可行尚書膳部員外郎散官勲如故

授崔殷刑部員外郎制

勅朝議大夫試太子舍人兼殿中侍御史崔殷學義精深

詞華絢麗臺郎高選清論洽於朝倫郡椽左遷善聲彰於  
時聽頃從獎序未副才名亟膺新命俾光舊列可行尚書  
刑部員外郎散官如故

授苗發都官員外郎制

勅朝散大夫前守祕書丞龍門縣開國男苗發德厚流光  
相門才子代重一經之業家承萬石之風理詣精微行歸  
純至麗以文藻振以英華端其誠而有恒敏於事而兼適  
早登學省用汰儒流喪紀外除素冠未改弟兄有裕清論  
多之處以彌綸之職當茲俊茂之選可行尚書都官員外

郎賜緋魚袋散官封如故

授莫藏用比部員外郎制

勅朝議郎檢校尚書倉部員外郎兼侍御史充稅青苗錢  
使判官賜緋魚袋莫藏用飾以文行敏於理道自執霜簡  
頗振風憲頃馳輜軒尤詳使命倚辦斯切積勞有成宜正  
列星之次俾承賜筆之寵可行尚書比部員外郎散官如  
故

授鄭渾水部員外郎制

勅朝散大夫殿中侍御史內供奉賜緋魚袋鄭渾族華才

俊風韻朗然禮以約已學以潤政常在清選久於持綱廉  
平簡直甚有名望舊制尚書郎缺以殿中執法次補之服  
我新命用循階歷可守尚書水部員外郎散官如故

授敬括御史大夫制

門下天子綱紀屬於風憲所以彈肅公卿課第牧守姦詐  
不息法令將廢豈奉憲者道未明歟眷求忠賢舉我事典  
金紫光祿大夫行同州刺史兼御史中丞充本州團練使  
守捉使上柱國平陽縣開國子敬括河汾大儒博達今古  
清心素行高簡自居粲然文章如振金石職更要重處以

公亮不恃祿以私身每依經以制事頃以馮翼近輔化參  
京師凋殘之餘勞徠所屬自廷尉之列分內史之餘清靜  
而鎮流庸悉歸閭閻小康理行第一休有聲績副茲厚遇  
肆予命爾亞秩台司無以時或多虞法有所貸必訪故實  
以澄源流直道而行不仁者遠慎乃名位爲時行之可行  
御史大夫散官勳封如故主者施行

授張獻恭御史中丞制

勅開府儀同三司行梁州刺史兼御史中丞山南西道節  
度觀察處置支度營田等使上柱國南陽郡開國公張獻

恭正以居業直以輔仁行三復而無玷剛百鍊而不缺階  
厯要重發揮刑政分總戎詰禁之柄處導俗宣風之長講  
求典禮以訓三軍精辨文法以檢羣吏瞻助孤老懷和遠  
夷峴南之輕裘緩帶蜀郡之得賢樂職交修文武儔諸古  
人而貞方侃然清峻自處端本靜性未嘗及私固可以準  
繩朝廷課第郡國入正二丞之列俾分三獨之事可行御  
史中丞散官勲封如故

授崔寬侍御史知雜事制

勅朝散大夫守尚書考功郎中長春宮使判官賜紫金魚

袋崔寬南臺是兩丞之亞以久於其職者參領羣務近制或選尚書郎累更執憲著稱一時多以本秩行御史曹事以寬介直方潔秉彝守中學可辨政文皆達理試用有績素知其才近司考課事任猶簡足以兼濟存乎使能佇揚峻風無或廢命可兼侍御史知雜事如故

授李瑁侍御史知雜事制

勅殿中侍御史內供奉李瑁宗室良才士林雅望懿以文行精於吏術近參清憲益著令名舉茲臺綱屬在公器宜膺俊選佇揚厥職衣以朱紱光茲白簡可侍御史知雜事



仍賜緋魚袋

授元異侍御史制

勅朝議郎侍御史內供奉元異踐行直方秉心純密懿文  
經務持法奉公積勞旣深令聞斯洽宜從職員之正式光  
風憲之選可侍御史散官如故

授蔣將明侍御史制

勅宣議郎殿中侍御史供奉東都留臺蔣將明祇服文儒  
精詳禮體持素範以行已秉清心而在公執法不違峻風  
自遠俾遷柱史分領臺綱可守侍御史東都留臺散官如

故

授崔益侍御史制

勅通議大夫侍御史內供奉前諸道營田使判官靈昌郡  
開國公崔益積德垂裕清才致遠久佐稷農之任仍參邦  
憲之列事必精當勤而有成宜正臺綱以明朝獎可侍御  
史散官封如故

授孫會侍御史制

勅朝散大夫侍御史內供奉充福建節度判官知上都留  
後賜緋魚袋孫會聞義執禮直以方外守信敦睦斷無他

賜紹儒門之學行工詩人之比興服我清憲介於戎車休  
有令名動皆成務允是公選正其命秩可行侍御史散官  
賜如故

授蓋文元殿中侍御史制

勅監察御史蓋文元直清勵行宏濟知名擢在憲司綽然  
有裕董其軍賦成績可嘉宜增執簡之威仍佐登壇之律  
可殿中侍御史

授王延休殿中侍御史制

勅朝議郎行監察御史東都留臺王延休雅有文行精於

吏術自膺察視克舉風憲績勞當遷獎善惟允俾新執法  
之寵式光彝序之進可行殿中侍御史依前東都留臺散  
官如故

授崔炎監察御史制

勅權知絳州絳縣令崔炎慎學潤身工文飭吏錯薪刈楚  
竹箭有筠蒞事咸許於宓生遺風尚傳於絳老公才可擢  
朝聽用章宜甄避蝗之美式踐栖鳥之列可監察御史

授源咸悌監察御史制

勅陝西運使判官朝議郎試祕書省祕書郎攝監察御史

賜緋魚袋源咸悌爰資素行早履清途假其執簡之名佐  
彼汎舟之役且聞集事亦旣書勞滿歲卽真俾光使局可  
行監察御史餘如故

授梁裒監察御史制

勅朝議郎試大理司直兼監察御史知河東節度上都留  
後梁裒業繼儒門才優吏術潔已以進貞心不渝職佐上  
軍榮參清憲在公益慎於事尤精宜分察視之員更勵風  
霜之操可行監察御史散官如故

授楊護監察御史制

勅守左拾遺楊護服於古訓文以彰之專靜向方恒久其道近參侍從之列不忘忠讜之言俾執清憲佇揚厥職可  
守監察御史

欽定全唐文卷四百十二目錄

常袞 三

授楊綰太常卿制

授李琬宗正卿制

授蔣渙鴻臚卿制

授鄭賁司農卿制

授呂崇賁太府卿制

授李瀚宗正少卿制

授周若冰光祿少卿制

授韋損大理少卿制

授景延之大理少卿制

授侯希超太府少卿制

授李憊祕書監制

授魚朝恩國子監制

授李永祕書少監制

授馬錫少府少監制

授薛伯高少府少監制

授陸鼎史館知修撰制



授荀尚史館修撰制

授衛輝校書郎制

授吳湊左金吾將軍制

授嗣吳王祗太子賓客制

授郭曜太子詹事制

授張謂太子左庶子制

授李廙太子左庶子制

授許從之太子右諭德制

授王寅太子左諭德制

授師良太子左贊善大夫制

授王幹等太子左贊善大夫制

授孫履暉太子左贊善大夫制

授張崇俊韓王傅制

授衛元珪蜀王府諮議制

授李友信蜀王府司馬制

授孟皞京兆尹制

授賈至京兆尹制

授京兆尹魏少遊加御史大夫制

授張延賞河南尹制

授李勉河南尹制

授路嗣恭京兆少尹制

授黎幹京兆少尹制

授賈耽太原少尹制

授張增鳳翔少尹制

欽定全唐文卷四百十二

常袞

三

授楊綰太常卿制

門下舜以伯夷作秩宗漢以列侯掌郊廟至於園丘大射之制禮官博士之論莫不綜詳得失而折衷焉故事職尊冠九卿之首朝議大夫守國子祭酒兼修國史賜紫金魚袋楊綰常在於道亦周於仁文以君子之言生知聖人之意司我載籍鴻聲不泯常典選舉後之法程迺者崇進名儒俾其宣明師訓講求三代稽合五經濟濟諸生誨之不

倦飽於道德之富成其禮讓之風況恭儉忠信恪守而彌固一時模表清議所高固可以處揚震桓榮之位領曲臺太府之重勉思厥服以稱任賢可守太常卿依舊兼修國史散官如故主者施行

授李琬宗正卿制

門下堯親九族禮重於敦序漢睦諸劉秩存乎宗正內姓之選豈伊異人三從叔祖銀青光祿大夫前婺州刺史本州團練守捉使上柱國荊國公琬才秀本枝挺此公器忠敬達順簡廉向方飭禮樂於身文詳典刑之政體夙所任

遇久於歷階勲勞理行當亦兼書思有補察義深肺腑固  
可以居宗室大臣之位敘文昭武穆之親懷德任賢敬茲  
休命可宗正卿散官勲封如故主者施行

授蔣渙鴻臚卿制

門下古之上卿次公一等至於西漢每與列侯參決朝議  
今之秩望亦謂之崇朕方修文德以撫區外則重譯象胥  
之事九儀相贊之職正用髦碩俾之典領銀青光祿大夫  
檢校刑部尚書知省事上柱國汝南縣開國公蔣渙顏子  
之德行張仲之孝友能積其厚以叢於身恭儉之訓可以

軌俗學通文變高視一時非得喪之可干亦剛柔之相濟  
服在通列且踰二紀精於憲章舉有倫要東雍居部近郊  
移風以禮除暴人安其業俾京師之河潤守經術之循吏  
司秋會府訓夏議刑以之弼教能用中典時屬四夷之敘  
參授大賓之任韓暨以宿德而拜陳紀以至行而遷求舊  
任賢正當此選待遇諸國宜約故事使有準以明等威也  
可檢校刑部尚書兼鴻臚卿散官勳封如故主者施行

授鄭賁司農卿制

門下國有大農實司金穀茲惟古官之重難於正卿之拜

朝散大夫試祕書監兼侍御史上柱國賜紫金魚袋鄭賁  
通敏良才沈詳雅識明斷臨事貞修奉公所更秩序必著  
聲績早參幕畫在樽俎而止戈自董軍儲有京坻之足食  
適時多可選眾攸歸爰藉變通主其出納務殷任切倚辦  
當仁宜膺理粟之命行繼康成之美可守司農卿散官勲  
賜如故

授呂崇賁太府卿制

門下九卿之重參理於佐邦六府孔修頒貨於列藏歷代  
右職莫非高選開府儀同三司行太子賓客上柱國公呂



崇賁忠謹良實居簡向方能用晦於精辨亦體微於剛貞  
峻節孤立清心確然以長才之有餘應羣務而多適擁旄  
乘塞周厯大藩薄於戰功經以事典用明旣富之教必厚  
豐財之德自頃艱阻有司曠廢府寺寂寥卿少虛設寔成  
其弊朕甚懼焉今再舉舊章各歸其局出納之地眷求惟  
精兼領三尚之煩以榮四至之列可行太府卿散官勲如  
故

授李瀚宗正少卿制

勅銀青光祿大夫前亳州刺史本州團練守捉使上邽縣

開國男李瀚識精於理才辨於政祗服禮訓甄詳事經振  
麟趾之芳更隼旗之命馴致其道達於家邦慈惠之化洽  
於黎老以親九族乃立貳卿宜敘周文之昭用毗劉德之  
任可行宗正少卿散官封如故

授周若冰光祿少卿制

敕試王府司馬兼福州都督府別駕占闕攝寧海軍副使  
賜紫金魚袋周若冰氣識沈和風儀端偉秉心以正莅事  
惟明法以言揚久參朝序頗有聞望洽於縉紳自佐法方  
州兼領戎事政術尤著勲勞亦深俾踐亞卿之列仍兼題

與之任可試光祿少卿兼福州都督府別駕占闕餘如故  
授韋損大理少卿制

敕銀青光祿大夫前潤州刺史上柱國馮翊縣開國男韋  
損識清行理強學自輔服於禮而中節居其業以全忠識  
能有餘階歷頗久京江按部終始六年勤職惠人風化一  
變循吏之稱去而益彰天下之平屬於廷尉乃立其貳方  
求直清俾之弼教敬爾繇獄可行大理少卿散官勳封如  
故

授景延之大理少卿制

敕朝議大夫前守河南少尹騎都尉景延之業擅文儒行  
資忠信推令望於公器著能名於吏途久踐周行夙彰聲  
實詳刑之地稱職其難任在簡孚選兼勤舊宜參河海之  
亞俾副朝廷之舉可守大理少卿散官勲如故

授侯希超太府少卿制

敕正議大夫試太常卿兼左領軍衛將軍上柱國賜紫金  
魚袋侯希超溫良植性藝業修身有臨事之幹能彰適時  
之才用班資久踐職務非親內舉自於元戎正名從於亞  
列宜成風俗之美俾展多方之效可行太府少卿散官勲

賜如故

授李德祕書監制

敕昔劉向父子代典文籍今之祕室豈曰避親再從叔正  
議大夫守光祿卿員外置同正員嗣澤王德幼嗣藩國夙  
彰忠孝素風自遠清識彌高傳魯恭之古文稟吳季之知  
樂早承先顧嘗歷大僚秉彝端潔流問休茂自合搢紳之  
望況推宗室之良寧止於敦族以恩固在於敘賢以位周  
稱外史晉謂內臺俾領儒官是崇禮秩可守祕書監餘如  
故

授魚朝恩國子監制

敕大司成以三德行教國子所以明詩書禮樂之宗立忠信孝友之本使方領矩步敬業樂羣繫於化成舊選尤重參其事任今亦難之開府儀同三司行內侍監兼充監門衛大將軍觀軍容宣慰處置使仍兼知處置神策軍兵馬事內飛龍殿內弓箭庫等使兼檢校鴻臚禮賓上柱國韓國公魚朝恩國之純臣忠以事朕竭誠宣力義貫神明有兩朝侍從之勤監六師征伐之事雅達名理參尚儒元遠涉源流旁通訓詁自頃右武未遑勤學方宏闕里之教用

金史卷之三十一 二  
二  
誠子衿之詩以其達俎豆之禮嘗亦委膠庠之事能以德  
義導其諸生國之俊選其貴遊子弟樞衣鼓篋歌詠先王  
之道春誦夏絃服勤師氏之訓而恭敬退讓抗疏累辭重  
奪勞謙之志權遂由衷之請今三千之徒資於學術思卒  
其業懷之益深用宏儒風式允公望可兼檢校國子監餘  
並如故

授李永祕書少監制

敕朝散大夫前守絳州別駕本州團練守捉副使李永慶  
自相門才推公器武子之德所謂在人元成之經不忘肄

業早從清秩備著聲華頃佐近藩眾稱淹滯俾參榮於祕  
府仍貳職於名都可檢校祕書少監兼揚州大都督府司  
馬散官如故

授馬錫少府少監制

敕中散大夫諫議大夫賜紫金魚袋馬錫躬服禮義處之  
以厚膺用多才動而濬發歷官有政居必修明擢登諫列  
屢獻忠讜言皆展意事亦主文勤職且淹以時敘進周之  
內府漢之尚方典掌服御任當親重輟我侍臣俾其參貳  
可守少府少監散官賜如故



授薛伯高少府少監制

敕前澧州刺史薛伯高昔揚洪公孫賀皆以儒術居於少府國朝監寺之列亦通稱顯貳於其長所任非輕以爾伯高早踐臺閣亟頒詔條勞績有聞聲譽不替因其秩寵寘在周行宜以廉潔自居用司所藏之職可守少府少監餘如故

授陸鼎史館知修撰制

敕左補闕陸鼎終始于學以致其道先儒未詳多所究博東南史之遺直補東觀之闕文左右諫曹所宜迭處鴻都

講藝亦在論思可左補闕充史館修撰

授荀尚史館修撰制

敕處士荀尚昔荀卿荀悅並有著書而尚遠承儒史之業  
深得述作之意思精大體經通王道慨然論事來自山東  
灼見古今之宜熟數理安之策嘉樂賢俊副于懷人春秋  
一字使之潤色結綬京輔進而錄之行成乎身不患無位  
可華州下邳縣尉充史館修撰

授衛輝校書郎制

敕二品子衛輝漢制有任子之令國朝三千石理行尤異

者賞亦及之況幼有令聞服於經訓校書祕閣以獎其才可宣義郎試祕書省校書郎

授吳湊左金吾將軍制

敕將我南軍秩高中尉以禁戎之重任委舅氏之同心具官吳湊塗山介祉章武雅才言而有宗儉而能廣達禮樂政刑之要存忠信孝友之誠艱虞歷年府寺失職素以賢戚之望職司太子之家清心奉公庶務悉理擅美春儲之棠流芳秋實之詠固可以首當褒進大勸官曹俾執金吾用彰貴任可左金吾將軍餘如故

授嗣吳王祇太子賓客制

敕古者選孝悌閎博有道術者輔翼太子今以宗室之老  
處賓師之位亦親親而教敬也光祿大夫檢校工部尚書  
兼宗正卿上柱國嗣吳王祇文昭之慶蔚于公族楚元之  
後繼有忠賢達道虛懷寬厚廉謹藩翰舊德人倫憲行更  
於內外職事頗修年在華皓未嘗衰情參會府而百工時  
敘掌宗卿而九族益親每託肺腑深加優禮宜以冬官之  
重仍在春儲之列可兼太子賓客其檢校工部尚書及散  
官勲封如故

授郭曜太子詹事制

門下正於官僚以視邦憲務兼內外選重古今銀青光祿大夫守太子賓客上柱國太原郡開國公郭曜丞相之子夙聞禮訓孝悌信讓清公仁厚端莊慎獨如有大賓之容沈靜少私澹然儒者之行濟以才識達於公方素多厯職之稱用叶居家之禮士林推重朝野洽聞待以客禮旣任賢於調護委之官事更持綱於彈糾可守太子詹事散官勲封如故主者施行

授張謂太子左庶子制

敕中散大夫前守潭州刺史本州團練守捉使上柱國河  
內縣開國子賜紫金魚袋張謂往以鴻筆麗藻列於近侍  
典謨訓誥多所潤色較然素節鬱有盛名言念華山之巡  
不忘潁川之從俾之領郡亦謂理平而孝悌宏博禮容循  
謹宜在公選首茲正人旌書課第之目參相春坊之重可  
守太子左庶子散官勲封如故

授李廩太子左庶子制

門下銀青光祿大夫前行給事中上柱國隴西縣開國公  
李廩德崇業廣多識前言究典墳之至精考禮樂之所極

時有著述贍而不流其在家邦率由忠儉歷位要重秉茲  
諒直久以病免澹然自居混冥元和屏絕外務每制度未  
決質文或差常亦處正大議冠諸宗室儲宮綜事可謂優  
閑豈迫以朝議且頒其祿賜煩於贊相寄在親賢可行太  
子左庶子散官勲封如故主者施行

授許從之太子右諭德制

敕朝議郎試太子司議郎賜緋魚袋許從之學究儒流文  
推策府行能優敏政事通明公勤之效備彰於履歷遲暮  
之年固資於頤養俾遷階秩仍遂休閑可朝散大夫守大

子右諭德致仕

授王寅太子左諭德制

敕闕內河東副元帥隨軍要籍朝議郎試祕書省著作郎  
賜緋魚袋王寅業繼儒門才通吏術嘗踐清秩不渝素檢  
自參戎府更展文韜進職官僚用嘉勤績可試太子左諭  
德餘如故

授師良太子左贊善大夫制

敕朝議大夫前舒州別駕直中書師良久直禁垣參典書  
命旣精文理尤達事經常遠其私亦過於慎夙夜有恪歲



時積勞顧班列而頗淹在朝章而可舉藩僚之選以序而  
進可守太子左贊善大夫依前直中書散官勲封如故

授王幹等太子左贊善大夫制

敕福建節度孔目官朝議郎試左金吾衛長史上柱國賜  
緋魚袋王幹文林郎壽州錄事上柱國郭皎等貞以幹事  
敏于在公掌戎門之條目精詳著稱董方州之財賦底慎  
惟勤宜懋乃官以疇其效幹可試太子左贊善大夫餘如  
故皎可朝議郎行鄂州武昌縣尉勲如故

授孫履暉太子左贊善大夫制

敕滑毫節度都知兵馬使銀青光祿大夫試殿中監孫朝  
俊父朝議郎行原州司戶參軍上柱國孫履暉器韞黃中  
行敦素尚勤於學藝守以謙光頃踐班資未申才用顧其  
允嗣積有勤勞宜列官僚俾光庭訓可試太子右贊善大  
夫散官勲封如故

授張崇俊韓王傅制

敕朝散大夫前守彭王府諮議參軍充內飛龍殿驅使賜  
紫金魚袋張崇俊敏行資身良才適用列官朱邸早陪文  
學之車從事玉臺久佐飛黃之阜疆力匪懈清心不渝忠

効見稱器能可錄王門傳道允藉純臣仍進榮階俾超彝序可銀青光祿大夫韓王傳餘如故

授衛元珪蜀王府諮議制

敕攝郡牧都使判官朝議大夫行祀王友上柱國衛元珪頃以勤勞爰從獎授紀官之號有犯聞名俾更他職式叶彝典可守蜀王府諮議參軍餘如故

授李友信蜀王府司馬制

敕正議大夫試祕書監前吉州刺史上柱國蕭縣開國男賜紫金魚袋李友信往以剖符閩徼頗守官常移鎮廬陵

稍遷秩序而晦明生疾寒暑經時久淹海隅尋易藩寄使  
臣所鞠情實用彰宜降常資之授俾申頤養之適可試蜀  
王府司馬散官勲封賜如故

授孟皞京兆尹制

門下天府惟雍神皋作京當四海之會同在三輔而尤劇  
漢以郡國二千石高第入守而轂下稱之今因其制而選  
用亦陟明於辨理也正議大夫守汝州刺史兼御史中丞  
知本州營田上柱國平昌縣開國男賜紫金魚袋孟皞端  
一簡亮外寬內肅兼文行忠信之美達禮樂刑政之要在

割能斷見事風生歷踐通列侶然處正自守梁宋化行山  
東承大軍荆棘之餘當析骸易子之後苦心精慮夙夜思  
職淳鹵載作豈止十千之耦流人自占實踰八萬之數可  
謂大郡表率一時理平移鎮汝墳不易其操懋茲聲績堪  
委重煩京師化源庶尹之則承平無事統正猶難或多毀  
傷失名數月輒罷況寇難未靖邊備尚勞率西之師取給  
畿內戎衣軍餉困竭閭閻姦人豪奪吏氣傷沮屢有申勅  
未懲其弊思得至公明斷之才曠然大變其俗是用命爾  
典司劇任勉修先父之職以繼緇衣之好肅清權右扶養

元元無俾趙張專美有漢可守京兆尹依前兼御史中丞  
仍充勾當神策軍糧料及木炭等使散官勲封賜如故

授賈至京兆尹制

門下方外甫定惟新制度必於根本源流正之以丕式於  
十有三牧縣內之御萬邦所瞻將自中刑外致一其政化  
若獨任辨吏何以模楷故前代尹京多用經術之士翟方  
進雋不疑皆首參此選稱於轂下今亦因其制而進用也  
正議大夫行尚書兵部侍郎信都縣開國男賜紫金魚袋  
賈至高文典誥合於韶雅五經大義會於宗極識畧精技

輔之以仁全節致命形於危難厯階要重澹然虛懷宗伯以和人神夏官以糾邦國久於參貳多所發揮省理持綱亦既詳當朝有大議訪求所得於公卿大夫之間舉漢魏名臣之奏不失其正有補於時加以經務大才堪任煩劇艱虞一紀曠廢百度有司失職京邑尤甚頻有賑救差可條緝今京府九卿率由舊典大變風俗以明朝綱統尹之重益難其任仗賢立政參領南臺懋乃休績慎乃出令以懲強猾以惠困窮舉能其官則理稱匪其人則敗端本靜末爾其誠之可守京兆尹兼御史大夫散官勲封賜如故

授京兆尹魏少遊加御史大夫制

門下肅清風俗糾正朝廷必求蹇諤之才式總綱紀之任  
金紫光祿大夫行京兆尹上柱國鉅鹿郡開國公魏少遊  
直方其行簡亮在躬有玉壺之清澄兼龍泉之斷割通變  
可以成庶務精密可以舉人倫中外累更風聲益振法無  
所避姦不能欺貳職司徒實平邦教三尹京邑備洽人謠  
不有兼官豈云重寄宜授趙堯之印俾雄張敞之職可檢  
校御史大夫餘如故

授張延賞河南尹制



門下域彼四海尹茲東郊分其三川式是中憲加以舟車  
之會轉輸之殷參貳保釐責成播殖總此庶務屬於兼才  
銀青光祿大夫行中書舍人上柱國河東郡開國公張延  
賞相府餘慶儒門濟美德行文學修身於四科忠肅恭懿  
齊名於八族綽有純性澹然素懷凡所歷職必聞異政推  
之以誠信明恕守之以廉能簡約既精練於典常亦陶融  
於理本故左曹之駁所爲平當南臺之綱斯焉振舉自參  
紫垣之列頗擅黃縑之妙然以素更中外可任煩劇河洛  
凋殘其來自久迭用良吏庶康疲人典領之重眷求無易

勞徠安集往哉汝諧可檢校河南尹兼御史中丞充東都副留守河南水陸轉運使仍充諸道管田副使專知都畿營田事散官勲封如故

授李勉河南尹制

敕四方取則千里分圻實惟卜洛之都咨爾尹京之任御史中丞東都畿內觀察使李勉才茂宗枝名推公器風標自肅操履愈高智畧可仗於安危忠貞克同於休戚親賢是賴中外必聞屬肆覲觀風三川展義來蘇望積處劇才難實資模楷之良共緝保釐之政可守河南尹兼御史中

丞勳封如故

授路嗣恭京兆少尹制

敕中散大夫守太子左庶子兼御史中丞充關內副元帥  
判官路嗣恭蘊其才畧資以幹能中外累更政聲尤異龍  
樓諭善載實春華烏府持綱克平霜憲三王佐理九扈劭  
農宜升亞尹之秩兼資大田之務可兼京兆少尹

授黎幹京兆少尹制

敕朝散大夫前守諫議大夫兼侍御史內供奉賜紫金魚  
袋黎幹經遠良圖宏通敏識典墳聚學風雅成文操守甚

貞行歸於正早登近掖見重中朝俊德用彰嘉言罔伏頃  
有歸閒之志益存難進之誠亞彼尹京眷求公器宜膺獎  
命俾展多方可京兆少尹散官勲封如故

授賈耽太原少尹制

敕朝散大夫殿中侍御史內供奉充河東支度判官上柱  
國賜緋魚袋賈耽燕趙瓌奇之士儒雅之才循良秉懿沖  
用經遠著安邊之上策佐分閫之中權行達理體精詳法  
度論兵契要先務於止戈饋運惟艱且聞於足食累書嘉  
績備洽令猷素推兼濟之能允叶至公之舉固可以貳其

尹正副我保釐俾參臺閣之寵仍賜采章之命可檢校尚書膳部員外郎兼太原少尹侍御史充北都副留守河東支度副使仍賜紫金魚袋散官勲如故

授張增鳳翔少尹制

敕朝議大夫守鳳翔府天興縣令張增平簡以清心直方以慎行積於政理擅於文詞字人晉陽大變風俗更秩陵邑不阿貴強迭居右輔其政如一屬府兼戎號歲聚軍儲允濟率西之師且無大東之刺賞以勸善官惟任能貳我藩畿仍參邦憲可守鳳翔少尹兼侍御史散官如故